

熙朝名臣實錄

熙朝名臣實錄卷十九

秣陵 焦 竑 驥

都御史顧公

事

長陵

獻陵

景陵

裕陵

顧佐太康人建文二年進士爲知縣莊浪拜御史巡廣西採木四川防守邊隘陞陝西按察副使再陞應天府尹尋以營建冗棘改順天公歷兩京尹剛稜不撓貴戚歛戢永樂十九年貴州有夷警改按察使貴州或曰勲戚家不利公以故相排擻去獻陵素知公廉健召爲通政使宣德三年臣僚奢縱御史多淫貪不法都御史劉觀被斥上問東西楊廷臣孰可掌憲者二人未卽對上曰未必乏

人至此西楊言通政使顧佐歷內外臺有風采東楊亦言  
佐尹京威廉上喜曰佐乃能如此擢右副都御史與鹽  
書曰都察院朝廷耳目國家剛紀用得其人則庶政清平  
羣僚驚肅否則百職怠弛小人橫恣近年在京諸司奸弊  
紛出司風憲者不能糾舉且與和同國何賴焉爾佐剛直  
廉正簡在朕心特畀斯任其竭誠盡力恪恭夙夜毋憚勤  
勞彈劾愆謬毋避權要毋枉良善毋縱姦究各道御史卽  
宜審擇凡廉勤公正老成醇厚者留用不達政體貪淫無  
耻及曾犯贓罪者送吏部降黜公差給假丁憂者亦如之  
御史缺行吏部慎選不得濫授欽哉遂考覈御史貪淫不

律嚴暄等二十人謫吏遼東不達政體李孟宣等九人降  
典史老疾馮斌等三人爲民五年暄潛入京造詞脅人公  
又劾暄踪跡詭秘且欲殺臣上誅暄西市陞右都御史  
奸吏犯科者摺奏公受隸金私遣歸上以公臺端不欲  
發其過密示西楊且曰爾不舉佐廉乎西楊閱奏謝曰事  
有之顧中朝官祿薄僕馬薪芻咸資之隸遣隸隸得歸耕  
官得資費中朝官皆然臣亦然蓋自永樂至於今先帝  
固知之以故增中朝官俸上怒曰朕方擇佐用小人輒  
誣佐必下法司治對曰末事不足干上怒請付佐治思  
法並行矣上召公授吏狀且諭曰此不足爲卿累小人

不樂卿檢制敢誣正人汝自治之公頓首謝公呼吏至言  
上命我治汝汝宜改行吾且貸汝上聞之益喜數月又  
有囚告公久淹不理上又怒召西楊諭曰此必死囚教  
之欲中傷佐立命三法司會鞫實出千戶臧清清殺無罪  
家三人奏當死繫獄上曰不誅清佐安能行法立命磔  
清西市正統二年公請老家居十餘年卒公性嚴重守正  
嫉邪人知敬憚以故竟擠之去先是有師遠者東阿人  
長陵北巡嘗問太子南京羣臣孰廉太子對曰皆廉  
上曰從朕北來者率好貨惟吏部侍郎師遠一人廉耳遠  
起太學生歷御史按察使堅貞有風裁靖難後陞兵部右

侍郎改吏部領行在吏部事征胡總軍餉陞南京戶部尚書兼領吏部達孝行純至操履端潔又有進賢向珪洪武十八年進士歷職方員外郎九年滿陞通政使不能奏對自陳改應天尹建文中坐累謫廣西靖難後復府尹坐繫獄數年左遷運司判官獻陵知其廉直召爲副都御史兼詹事宣德初蒞南臺致仕珪有文學屢經窮阨介節不渝蔬食水飲布衣泊如也

都御史軒公

事

長陵  
裕陵

獻陵

景陵

公名輓字惟行鹿邑人永樂二十二年進士督漕淮上嚴冬忽墮水援出裹被坐有司急進衣却去竟俟舊衣乾除

行人司副陞監察御史正統元年與御史十六人出清理軍政清修苦節嚴明不苛人畏服之陞浙江按察使四時一布袍蔬食不厭約諸僚三日出俸易肉一斤故舊經過輒留飯唯肉或至殺鷄見者皆驚異輒廉使殺鷄爲客大破費遭喪卽行僚屬尚未及知時守浙阮監丞隨亦清謹安靖與公善公旣去陳璇代公亦清嚴浙臬稱治景泰四年公爲副都御史巡撫浙江改南臺內艱奔喪天順初首用公爲刑部尚書耿九疇爲右都御史二人廉介有名海內信向未幾耿公欲去石亨不果反爲亨逐去公亦病請致仕上召公至文華殿面諭留視公疾不可強與

致仕及陞辭。上復問公曰：昔浙江廉使考滿歸家，僅二竹籠是汝乎？公頓首謝。又問：卿年未老，病愈再可用乎？公又頓首辭疾。上賜金爲道路費，公去。上復思公，召爲左都御史，督南京糧儲。公嚴毅，歲時詣禮部拜表慶賀，屏居一室，撤燭朝服，端坐寂無一言。鼓嚴出行禮，禮畢竟御肩輿歸。僚儕聞公來，輒避去，不樂與公處。南武庫郎沈琮嘗言留都大臣唯公及魏驥、廉平、峻偉，不務文飾，間令吏寫公牘數十冊，卒後修史有司從其家取行實，無有也。公前有南海周新者，永樂中爲浙江按察使，廉梗有威，爲錦衣紀綱，中傷死。獻陵每悼惜之人，稱新爲冷面寒鐵公。



尚書魏文靖公

事

長陵  
裕陵

獻陵

景陵

公名驥字仲房、蕭山人、永樂三年鄉舉、明年爲松江府學訓導、諸生讀書學宮、或夜携茶粥勞問諸生、益感激自奮、滿九載、諸生楊珙等詣闕乞留、獻陵監國令還任、復教三年、十七年師達薦陞太常博士、宣德初陞行在考功員外郎、轉南京太常少卿、三年召試行在吏部侍郎、踰年爲真、八年老辭調禮部、又辭調南京吏部、正統十三年陞尚書、景泰元年年七十七致仕、公嘗至京師、大學士陳循公所取士、謂公曰、先生雖位冢宰、未嘗得立朝、願少待公曰、君爲輔臣、宜爲天下進賢才、不得私一座主、茂陵復位、

進榮祿大夫、居家二十年、布袍糲食、簡約廉勤、性好吟詠、  
矢口適情、自有雋味、耄年事其兄、教諭騏愈、恭謹成化間、  
監察御史梁防疏公有德有壽、請如漢故事優禮、特遣行  
人存問、賜羊酒、有司加粢月三石、公病、遺書子完、勿擾鄉  
里、營墳墓、已有司得請、如例葬祭、完以遺言力辭、公身不  
勝衣、言不出口、清德雅望、海內達尊、卒年九十八、諡文靖

都御史魯公

事長陵  
裕陵  
獻陵  
景陵

公名穆、字希文、天台人、永樂元年進士、爲監察御史、獻  
陵監國時、列上漢庶人不法罪狀、留中、陞福建按察僉事、  
雪冤濫、懲貪墨、摧豪強、泉州人有李姓者、妻吳美、舊與富

姻林私李調官廣西林令二僕從李行殺李道中并殺其姪吳竟適林李宗人訴之郡得賂反坐李宗人誣又訴按察司司得賂如郡十餘年未決公故廉得踪跡甚詳一訊林卽服漳富人許初無子後兄子已而妾有子與兄子貲三之一托以已子許死兄子言妾子非許子逐去盡奪其貲公大召縣中父老及許宗人詢之皆曰妾子本許種也兄子始服罪超陞僉都御史召入臺正統七年巡視應天府公幼舉動異常兒稍長攻苦食淡力學博經史嘗大書座右咬得菜根百事可做比入官請寄不行問遺並絕歷官中外三十餘年家無餘貲歿不能歛公卿贈賻僅足棺

袁國初有薛祥無爲州人佐孝陵開國有功歷陞工部

尚書頗以怨言聞下獄死家徙瓊州孫遠進士授戶部主

事天順初使交南還陞右侍郎母憂去起復爲工部侍郎

治河河南尋鑿揚州河四十里成化初兵討兩廣叛獠改

戶部調兵食諭衆能破賊者卽有其輜重人人奮勇師至

大藤峽賊平陞左侍郎三年進尚書總督京儲六年行視

漕河十三年致仕明年起爲兵部尚書參贊軍務十六

年致仕弘治八年卒年八十三遠於禮樂兵刑天官律曆

無不涉獵尤熟國朝典故在戶部最久文移奏劄悉出其

手改定戶部事殞後繁正訛均節委積內外遠近多寡輕

重咸有品式會校出納吏胥拱手時中外競陳利害始一人以爲可行而行又一人以爲可罷而罷公一切弗聽居官四十年家無長物食無兼味室無媵妾曰吾少事親恒不足今安忍有餘

侍郎李忠文公

事

長陵

獻陵

景陵

裕陵

公字時勉名懋以字行先金陵人徙居安福永樂二年進士公少有大志甫成童每自勵曰顏曾希聖四勿三省庶吉士時預修太祖實錄憂去服闋授主事刑部召入修書書成進翰林侍讀十九年三殿災求直言條上十五事未幾譴構下獄二十一年出獄復其官

英初卽位公

有疏諫疏留中不知所指云何。上怒，縛至便殿，命力士  
捶十八瓜，折其觔。幾死。明日，改監察御史。又明日，下詔獄。  
宣德元年十月，上恨公言薙髮，仁考怒，令縛時勉來。  
朕面鞠，必殺時勉。已又令王指揮縛時勉，斬西市。王指揮  
出端西旁門，公已爲先輩使者，縛入端東旁門，門中相左。  
王指揮至獄，知公入，亟走還，縛公送西市。公已得見上。  
上顧憐時勉忠臣，能直言，立脫公桎梏，復其官，預修兩  
朝實錄。陞侍讀學士。正統三年，進學士，尋陞國子祭酒。是  
時祭酒缺，西楊歎祭酒難其人。公曰：「豈遂乏人耶？」程雲南  
在旁，言無過公者。公不悅，竟以公爲祭酒。初，公與陳敬宗

在翰林袁忠徹、二人並列曰：二公他日功名相埒。陳儀相法觀魁梧，公貌稍寢，聞者未信。後二人皆至祭酒，陳方嚴肅，下公平恕得士，並著聲太學。公崇廉耻，抑奔競，別賢否，示勸懲，變士習。諸生貧不能婚，病不能醫，死不能喪者，節縮餐錢力為贍給。督諸生讀書，寢興有常，燈光達旦，書聲不絕。恩義浹洽，不啻父子。王振惡公守正，構公荷校國學門。諸生石大用上章願以身代，號哭奔走闕下，請赦公者數千人。以故得解，尋乞致仕去。諸生走涕泣送，觀者塞途。商賈為罷市。又明年，聞北狩，北面頓首號慟，上疏言選將練兵迎還。軍駕數事，景泰元年卒，年七十七。諡文毅，成化

中贈禮部侍郎、改諡忠文。宣德中，姑蘇有陳僉事祚，初以進士仕。永樂時，爲河南叅議，與分廵官交章言事，編置均州、泰和山，且十年。景陵起爲御史，疏請上讀大學衍義。上怒曰：「蠻嗤朕不讀書，大學且不識，豈堪作皇帝乎？」并逮其妻子，族人繫詔獄五年，出獄復發遼府不法事，又下獄。出，又劾法司亂成法，吳文定公曰：「陳御史忠義之心，剛大之氣，蹈而復奮，幾死不悔者也。」

祭酒陳公

事

長陵

獻陵

景陵

裕陵

公名敬宗，字光世，慈谿人。永樂二年進士，時選庶吉士七十餘人，再選留曾榮及公等二十八人讀書文淵閣。上



時臨試，勗其文行，公預修永樂大典，成授刑部主事。永樂十二年，預修五經四書性理大全，入史館，預重修高皇實錄，成改翰林侍講，獻北京賦、平胡頌，及爲善陰陽頌。十七年春，卿雲見，甘露降，獻聖德瑞應頌。是冬，甘露再降于孝陵松栢，復獻頌。又獻龍馬騏驎獅子騶虞賦。內艱去，宣德改元，起復，修兩朝實錄，未及成，轉南京國子司業，秩滿。陞祭酒，公美鬚髯，容儀端整，步履有定則，久居太學，力以師道自任，嚴立教條，痛革舊習，日勵諸生進學成德。是時，睿宗之政肅於朝廷，公以是得名，亦以是致怨。僚屬生徒懷忿訟公，法司請逮。聖祖文襄曰：「盍疏申雪。」卽爲屬草，不

果上事亦白。時關中楊鼎發解，試禮部下第，疏乞入南監。  
從公學。上從之。鼎至監，清苦力學。後舉禮部亦第一。廷  
試第二。仕至戶部尚書。公善飲，嘗飲襄城伯李隆所。隆知  
重公，賓罷輒留公再飲。飲酩酊，言貌儼然，若未嘗飲者。一  
夕飲過劇，兀坐喧。顏中人伺公，見公拳握最謹，其矜嚴如  
此。公剛正介潔，不見喜愠。官太學二十餘年，諸生多位至  
卿貳公，獨久不調。時北監祭酒李時勉約束諸生，身教亦  
嚴。世稱南陳北李。景泰元年引年，與魏文靖公同致仕。公  
德望文章，名聞朝野。旣退，家居不輕出入，別號澹菴居士。  
至是又號休樂老人。云有詩文十八卷行於時，曰澹菴居

士集天順三年卒年八十三彭惠安公

贊曰行方而嚴學優而粹勢利紛如頽然無累抑抑德隅人望知畏詞林重輕卜其進退時有古廉於公作配古廉卽時勉

都御史吳文恪公

事獻陵景陵

公名訥字敏德常熟人父爲沅陵主簿誣繫京公乞身代入白父沒治喪如禮公篤行好古兼善醫術有名江東郡邑交薦爲學官不就永樂末舉醫生至南京疏懇辭時太子監國知公命教大臣子弟於禮部儀侍郎重公遣子銘從學洪熙元年除監察御史歷陞南院僉副都御史

慎直廉不務矯飾議論舉措自耻詭隨嘗巡撫浙西表陸  
宣公里修岳鄂王墓斷秦檜碑以扶植綱常爲務爲文根  
抵經書通達今古在臺十餘年目詞義色風采凜然雖心  
存恕厚未嘗察察求人過而奸賊不法之徒自然消縮摧  
沮宣德五年請老年八十六卒諡文恪所著小學解集錄  
文章辭體行於世

御史孫公

事

裕陵

景帝

公名鼎字宜鉉廬陵人永樂間以鄉舉歷江浦松江學博  
士甚得士心彬彬多典起者楊文定溥薦爲監察御史督  
南畿學政公教壹以德行爲本而文藝次之學置本源錄

錄諸生善行、以身爲率、不事譏防、行部令勿先知、從單輿  
猝至、諸生集、輒閉門面試一文、或破題數首、隨問隨定、畢  
便開門、呼名而出、案牘隨之、先後允愜、私囑者、無所措手、  
嘗見庭橘方熟、命左右摘嘗、因分畀諸生、同啗之、一生獨  
取其二、公問之、以奉親對、公大賞、倍遺之、時應天苦旱、飢  
甚、奏免其租什七、賑濟萬三千餘石、賴以全活者甚衆、庚  
午秋試時、上北狩、公小試罷、謂諸生曰、諸君從有司試、  
當簪花燕餞、今日爲臣子枕戈之秋、老夫不敢陷諸君於  
不義、乃與飲茶、令從中道行、自步送出門、既而詣闕上  
疏、請隨所用以效死、不報、乃自矢於文信公祠、去蒞所部

道遇金尚書濂、慷慨對泣、有萬里丹衷、扶日以兩人清淚、對山河之句、其忠憤如此、庚午、勅封其父母、得告歸省、父聞、恩命至、擁騎郊迎、公塗行、控御甚虔、觀者榮之、明年還朝、念親老、請致仕、歸後、祭酒司業缺、當道屢欲論起之、郡守金陵張瑄疏公孝、追曾、閔、學、踵程、朱、立起居論思之職、皆未果、名卿大夫過公鄉者、必禮於其廬、鄉人子弟考德問業者、無虛日、守若令以下、時從乞言焉、歸六載、爲天順元年十月朔卒於家、年六十有六、

布政使夏公

事

裕陵

景帝

茂陵

公名寅、字正夫、華亭人、正統十三年進士、幼岐嶷、有巨人

志日記數百言、稍長益肆力問學、初爲南京吏部主事、歷  
郎中、杜門誦經史百家言、久之、發爲文章、淵閎奧密、脫去  
流俗、自成機杼、陞江西按察副使、提學、專崇實行、黜浮華、  
閱卷一目數行下、又善鑒別、復文山祠、葺白鹿書院、修陶  
侃讀書臺、陞浙江叅政、處州民苦虐政、走山谷、招不聽、口  
須夏叅政來、公檄至、卽散、成化二十二年、進山東右布政  
使、敬簡有容、愛民節用、公誠心直道、無黨無援、自筮仕爲  
郎二十年、爲副使十六年、未嘗以淹屈降志、嘗曰、君子有  
三○惜○此○生○不○學○一○可○惜○此○日○閑○過○二○可○惜○此○身○一○敗○三○可○  
惜○

侍郎劉文介公

事

裕陵

景帝

茂陵

公名儼字宣化吉水人正統七年進士第一人除翰林修撰茂陵在東宮公爲左春坊大學士充國史副總裁已而陞太常少卿兼侍讀學士景泰七年考順天鄉試內閣陳循王文有子試屬公公不爲地皆不得舉二人令其子錄試文訟公閱文不明取士徇私會譯字官劉淳卷注翰林院考中送入貢院比書榜竟落淳名二人因劾公違制并摘命題雖欲自絕語請如洪武中劉三吾等坐公罪重開科試十上命高文義公覆試高公力言二臣之子文亦可觀顧解有定額儼等無罪上重違二人意令順天



府准其子會試。王文復疏辯。上不喜曰。敢再言者以大。臣擅法論。乃已。先是廬陵羅崇岳舉順天第一。以詭籍斥。還縣學。時人爲之語曰。榜有姓名。還是學生。榜無名氏。京。闈貢士。明年。裕陵復位。二人得罪。其子竟不得試。禮部。公卒。贈禮部左侍郎。謚文介。公學有沉潛。文無險塞。取予。明潔。

少保林莊敏公

事

裕陵

景帝

茂陵

公名聰。字季聰。寧德人。正統四年進士。爲刑科給事中。劾。石亨。楊洪。孫鏗。諸大將。及內臣善增。金英。著風裁。景泰元。年。遷都給事中。上皇將還。會有投匿名書者。王文端得。

之高文義所王與胡忠安然聞上曰此所謂禮失而求諸野已而或出危言事且止公疏言直渎皆股肱大臣不當私言齟齬大政詔按之高曰得之小隸小隸曰得之道路上怒急捕千戶龔遂榮挺身自白曰迎上皇禮本當厚遂榮投此帖冀感動無他腸甘死無悔已乃下廷議或言也先遣使行成虜不可信卽迎駕一車二馬足矣公言上皇北狩與陛下迎鑒皆社稷綱常大計宜厚無他日悔竟從其議景泰三年議易儲改右司直郎不敢辭四年商文毅薦復爲吏科都給事中劾吏部尚書何文淵刑部尚書俞士悅通政司李錫工部侍郎張敏諸大臣益多忌

公王少保。喉御史王溥劾公挾持吏部。甥選教官得善近。地下廷議。按致公賂。不得坐。比擅選法死。胡忠安不肯署。稱病臥數日。上遣中使問對曰。老臣本無病。聞欲殺林聰。殊驚悸耳。上聞意立解。公左遷國子學正。裕陵復

辟超陞右僉都御史。賑山東飢。陞右副都御史。捕江淮鹽賊。天順三年內艱。明年起復。又明年曹欽反。起大獄。牽連寃濫冒功者。至割乞兒頭上功。都人不敢夜出。公時署院事。力請禁戢。平雪讐嫌。成化二年江淮旱。人相食。公往賑。奏截漕粟數十萬。明年九載滿秩。陞右都御史。七年出撫大同。將吏用命。邊事稍寧。逾年致仕。越二年起掌南院。又

三年召入爲刑部尚書加太子少保十五年與定西侯蔣琬按事遼東馬鈞陽及御史強珍竟坐謫戍明年乞致仕不許十八年卒贈少保諡莊敏公恂恂和易身若不勝衣遇事可否大義毅不可挽抗議易儲直聲大振

當以龔遂榮爲正傳而附以林聰乃當

太子太保張莊簡公

事

裕陵  
泰陵

茂陵

公名悅字時敏華亭人天順四年進士少凝靜篤學力行鄉里推重及居官奉職守法自刑部出爲浙江提學初糊名校士尋曰我且自疑人誰信我請託覬覦屹不爲動成化二年湖廣按察使朝覲時東廠尚銘忌公伺察無所得

未幾銘敗、歷陞工部侍郎、秦陵卽位、改禮部、再改吏部、

六年、大旱、陳數事、又上修德圖治二疏、時三原在吏部、倚信公、三原致仕、衆望屬公、徐丘皆不喜公、欲用翰林入吏部、出公南銓尚書、尋改兵部、叅贊機務、嘗謂人曰、古之聖賢、凡所猷爲、至公無私、故其事業、光明俊偉、今之人、去古遠矣、竭其公忠、猶恐不至、况復濟以私乎、或言有善讀書、不善作官者、公笑曰、此正不善讀書耳、四年、六疏乞歸、上爲賜璽書、加太子少保、致仕、歸處舊廬、杜門不出、見風俗奢靡日甚、益崇節儉、嘗有言揭屏間曰、客至留饌、儉約適情、肴隨有而設、酒隨量而頃、雖新覩不擡飯、雖大賓不

宰牲匪直可久亦以安生卒贈太子太保諡莊簡楊文懿公嘗曰吾友三人時敏廷秀鳳儀皆始仕刑部爲名卿

太子少保彭惠安公

事

裕陵  
泰陵

茂陵

公名韶字鳳儀莆田人天順元年進士爲郎刑部時張岐以壽寧侯兄從外臺臘僉都御史入院公疏岐不可用乞召故尚書王竑李秉侍郎葉盛下詔獄給事中毛弘等論救得釋尋郎中廣東司司隸輦轂間事多涉貴近豪戚脅挾撓沮公屹然不吐茹外戚家冒賜額奪民田勅公卽按頃畝公至真定繞田周視徑歸上疏自劾曰昔田文令馮驩收債于薛驩顧折券矯賜薛人今真定田祖宗以來許

民開種卽爲恒產不復增科以勸力農往年韓太監廣寧  
侯奏虐民賴先皇明聖民間稍得安業乃今周瑄又復  
強詞飾奏傷民病國臣誠不忍履畝奪小民尺寸地附益  
貴戚又逮下詔獄言官交論得釋他日又有貴戚請荒田  
者上怒顧左右曰周瑄爲彭韶所持令朕負朝論奈何  
又以爲請耶當是時何喬新與公同官刑部純懿貞方並  
負重望成化六年陞公副使按察四川進按察使請王府  
葬祭停遣內臣及行人又劾雲南太監錢能冒貢珍奇擾  
驛遞十四年爲廣東布政使薦陳獻章劾鎮守太監顧恒  
非禮貢獻又劾市舶太監韋眷矯稱進奉私庇富豪輒亂

有草妄開新法、民間力役更無曠丁、籍上均徭、豈有餘戶、  
又劾珠池監丞黃福、採捕禽鳥、騷動雷廉、又劾錦衣鎮撫  
梁海、海者、太監芳弟也、芳見疏大怒、會公應詔陳言、條上  
漸不克終四事、上不喜、芳從旁言、公每事輒邀名、方命

○聖○明○

左班相左右、科大官、上直視、芳不應、芳懼、伏地、請公貴

州、未幾吏部尹尚書屢薦公大臣器、上故知公名、二十

年、遂陞副都御史、巡撫江南、督糧儲、明年、召入爲大理卿、  
未上、又坐論內外官貢獻、道改副都御史、巡撫順天、奉  
陵卽位、交薦、召侍郎刑部會、浙江不靖、勅公巡視、公劾罷  
不職守臣、誅其渠魁、事遂定、戶部言鹽法沮壞、復勅公理



鹽法公繪煮海貧人晒淋熬負折閱朋儕之苦節爲八圖以獻尋召入吏部爲侍郎弘治四年尚書刑部安遠侯柳景總兵兩廣兩廣巡撫秦紘餐其奸贓鉅萬景有挾欲破法擠紘公竟抵景法磔其爵景贓入八百兩忽降蠲旨公言景贓十未及一卽蠲它日遂可營復爵位爵位旣復遂可營求征鎮不可長公在部二年請致仕卒贈太子少保諡惠安林俊嘗疏言韶諡不副行乞如葉盛吳訥魏驥等諡不報公孝友直諫寡慾清心儀狀歉然不啻寒士所著有國朝名臣錄贊莆陽文獻志政志文集百餘卷

卷十九終

熙朝名臣實錄卷二十

秣陵 焦竑 輯

尚書楊文懿公

事 裕陵 茂陵 泰陵

公名守陳字維新鄞人也景泰二年進士天順二年授翰林編修成化三年累官司經局洗馬充講官經筵公進講武成曰論語稱舜無爲周書稱武王垂拱顧後世人主深拱禁中委政內侍反召閭樂之禍高居無爲唯對嬖艷反啓祿山之亂何也蓋舜武能舉相除凶惇信明義後世人主直安危利灾耳八年遷侍講學士內艱去公守官五品一十六年泰陵出閣簡公日講時文華大訓成篇目倣

大學衍義事涉中官令不得刪去尋陞少詹事兼侍講學士公譽望日起薦國子祭酒薦吏部侍郎又薦入內閣皆不果用泰陵卽位進宮寮官柄臣忌公擬侍郎南吏部上覽疏曰守陳宜留此卽塗去南京字未幾詔議祧禮禮

官請祧

懿祖以

德祖比宋僖祖百世不遷公疏言禮

可謂篤論

天子七廟祖功宗德故凡號太祖者卽始祖必以配天若商周契稷皆有功德非直原本統也宋僖及我德祖可比商報乙周亞圉非契稷比議者習見宋儒嘗取王安石說遂使七廟既有始祖又有太祖太祖配天又不得正位南向名與實乖非禮也時不能從弘治元年疏論講學聽

政累數百言略曰陛下御極以來屏棄珍翫放遠奇袤聽納忠諫躬覽題奏持此不懈可幾堯舜臣愚過慮正始猶易保終實難若內養弗深外資弗博銳志少懈怨心漸滋有初鮮終古今大戒上是公言下禮部三月御經筵禮部并請午朝得如公奏後數年上時召輔臣坐論政事閱章奏皆自公發之大臣顧畏上英明一見卽頓首伏地請退上留再三又謝容臣等出議上上每退歎息公在吏部侃侃持正論會修憲宗實錄充副總裁再請解部事專史職不允未逾年又辭且請老曰吏部進退百官衆怨所集尚書王恕尚不免人言况臣迂踈宜亟退

上不許公請老益力乃以本官兼詹事丞專職史館而以張莊簡代公云公嘗曰國可滅史不可滅靖難後不記建文事遂使當時朝政與方黃死事諸臣皆闕落無傳及今蒐采猶可補輯景帝已正位號英宗實錄標目猶書邸戾王附宜改正凡疏留中者卽忠言正議國家大政事例不得登實錄宜宣付史館以備遺忘疏具病不果上卒諡文懿後二年實錄成始贈禮部尚書公孝友方正與人交篤於信誼居常恂恂若不出口至論事辯是非毅然不可屈博學多識文詞淳雅五經四書時有獨見不泥古說錄爲私挾凡數百卷弟守陞南吏部尚書從弟守隨掌大

理寺事、工部尚書、謚康簡、守隅、廣西布政使、二子茂元、刑部侍郎、茂仁、四川按察使、皆能濟美、克世其家、

太常卿張公

事

裕陵

茂陵

泰陵

公名元禎、字廷祥、南昌人、天順四年進士、選庶吉士、授翰林編修、茂陵卽位、未幾、與時宰議不合、請告歸、家居二十餘年、益潛心理學、名益高、廷臣交薦、弘治初、召修憲宗實錄、進左贊善、錄成、陞侍講學士、去南京、乞歸養母、家居者又九年、以修大明會典、衆交薦之、召爲副總裁、陞翰林學士、日講、泰陵知公名、特聽公講說、母服闋、又交薦、進南京太常卿、修通鑑纂要、又召爲副總裁、改太常卿、

兼翰林學士日講又侍東宮講讀未幾掌詹事府管內閣誥勅疏勸經筵講太極圖及西銘諸書東宮講孝經小學上欣然嘉納亟索太極圖觀之曰天生斯人以開朕也公貌癯然纖弱而剛果之氣不可屈好面折人過交陳選羅倫陳獻章皆以正學相規切

光祿卿陳恭愍公

事

裕陵

茂陵

陳選字士賢浙江臨海人端慤寡言潛修獨詣唯以古聖賢爲志天順庚辰試禮部嶺南丘濬得其文曰此古君子也真第一及相見而貌不揚濬曰吾聞荀卿云賢聖無相將無是乎授監察御史會修撰羅倫論大學士李賢起復

謫官公抗疏直之出按江西風紀大振布按長貳謁每易  
素服以入公曰此非憲綱體也人臣覲君服必視其品顧  
獨殺於御史前乎於是皆動色相戒不敢犯已督學南畿  
念學者不修實行而競爲浮詞取科第力欲變其故習校  
士一以德行爲本試卷明列諸生姓名不爲彌封曰吾且  
不自信何以信於人邪條冠祭射儀令諸生以時肄之每  
按部就止學宮徐行審觀周旋磨折絃歌遵亓古風郁然  
前後三載變色之言不施於衿佩而成就興起至不可縷  
數論者謂自廬陵孫公以來一人而已成化初遷河南兵  
備副使尋改提學其設教亦如南畿會倖奄汪直被命巡



郡國都御史以下咸匍匐趨拜公獨長揖直怒曰爾何官  
敢爾公曰提學直愈怒曰卽提學寧大於都御史邪公曰  
提學非都御史比但宗主斯文爲世表率雖死不可屈節  
直見公詞氣嚴正而諸生且集署外不可犯遂改容曰先  
生無公務相關自後不必來公徐步而出尋轉按察使釋  
繫囚除苛細凡諸宿弊一切罷去獨於臧吏不貸自是官  
屬斂戢未幾聞母喪卽日奔歸士民泣送者數千人立一  
祠祀之服除擢廣東布政使時嶺南苦中人椎剝公嚴條  
約罷和買減徭役爲惠養計會肇慶大水公具災傷狀不  
待報輒發粟賑之市舶太監韋眷專恣勒富民供辦公奏

減其數眷復縱黨通番番禺知縣高瑤發其贓鉅萬都御史宋旻不敢詰公獨移文獎瑤番人馬力麻者買貨海口詭稱蘓門答剌國貢使眷利其珍奇將許焉公發其僞逐之又有撒馬兒罕使臣泊六灣還國柱道至廣謂將往滿剌加市狻猊入貢公上言此西域賈胡借以牟利耳使墮其術必爲安南諸夷笑不報眷知中官戚疾公乃誣憾公黨北高瑤和同貪墨上怒遣刑部員外郎李行會巡按御史徐同愛鞠之行同愛畏眷不敢反異復賂公所黜吏張襲令誣執公襲不從行等阿眷執襲拷掠襲曰死卽死耳安敢以私憾滅公義陷正人也行等羅織無所得乃誣

公矯制發粟，曲庇屬官，論罪當徒，奏入。詔奪公官，遣錦

衣逮公。士民數萬人號泣遮留，以衛士辟除，乃得出省城。

至南昌，疾作，卒於石亭寺。時年五十八。友人張元禎殮以

疏綌，或咎其薄。元禎曰：「公平生清苦，殮以時服，公志也。」張

公事未詳者皆于疏中芻之

駿乃上言：「臣聞周公元聖而四國之謗乃致，上疑於其君，

曾參大賢而三至之言不免搖惑於其母，豈成王之不明，

參母之不親哉！凡以口能鑠金而毀可銷骨也。陛下明

並日月恩同父母，詎圖怙冒之中尚罹屈抑覆盆之下復

有沉寃，竊見廣東布政使陳選少崇正學，夙抱孤忠，才處

羣邪之間，獨立衆憎之地，太監韋眷通番敗露，知縣高瑤

按法持之選多文嘉獎以激貪懦固監司之體也奈何宋  
旻徐同愛怙勢保姦首鼠兩覩以致眷橫行胸臆汚巖清  
節熒惑聖明勘官李行承眷願指鍛鍊成獄竟無左驗  
臣本小吏以誑誤觸法爲選罷黜實臣自取眷妄意臣必  
憾選以厚賄陷臣令扶同陷選臣雖胥徒安敢欺昧心術  
顛倒是非眷旣知臣不可利誘乃噤行等逮臣於理彌日  
拷掠身無完膚臣甘死額天終無異口行等乃依傍眷語  
文致其詞劾選勘災不實擅便發倉曲庇屬官意圖報謝  
是毀共姜爲夏姬訢夷齊爲盜跖也頃年嶺外地震水溢  
漂民廬舍屬郡交牒報災老弱引領待哺而撫按藩臬若

罔聞知選獨抱隱憂食不下咽謂展轉行勘則民命垂絕所以便宜議賑志在救民非有他也選素剛正不堪屈辱

乃爲勘官凌侮憤懣成疾旬日而殂李行幸其就死不爲

此疏亦知選否

醫療又潛遣養子密報選歿於眷以快其忿宵人佞毒一

至于斯司寇之屬要在詰奸刑暴安取此輩爲也夫選砥

節奉公橫罹讒構君門萬里孰諒其冤臣以罪人擯斥田

野秉來自給百無所圖敢冒死披陳甘心鼎鑊者誠痛忠

廉之士銜屈抑之冤長讒佞之奸爲聖明之累也奏入

不報第以他事罷眷鎮守弘治初工部主事莆田林沂疏

雪公冤詔復官禮葬正德中追贈光祿卿諡恭愍初公

做范文正公置田百四十畝祀先周族名思遠莊迨卒族以公甚貧舉田還其子戴戴不可曰先人行義戴取而私之獨不愧乎人謂公有子云

太子太保吳文定公

事

茂陵  
康陵

泰陵

公名寬字原博長洲人成化八年進士第一人時年三十八公爲諸生時有文行卽負重望徐武功嘗稱吳生館閣器歲貢入太學張汝弼尤奇公歷官翰林坊詹侍康陵東宮宮中侍堅不欲太子近儒臣數移事閒講讀公率宮僚上疏曰仰惟東宮講學寒暑風雨則止朔望令節則止一歲不過數月月不過數日一日不過數刻况又間

有推移時或罷歇古人八歲出就外傳欲離近習親正人也借曰習讀於內終不若就傳於外上嘉納公進講閒雅詳明意存規諷至理亂邪正安危之際尤反復朗誦弘治十七年孝肅太后崩議祔葬廟禮先是成化四年

孝莊睿后崩中外藉藉言周太后萬歲後葬裕陵祭

睿廟禮皆如適至謚稱睿皇后與孝莊同輔臣覺其誤又未敢顯言詔禮官議議未能決賴上仁聖張主綱常

再三召輔臣密議便殿悲愴感悟必欲如禮又下議廷臣公以掌詹事與議衆促公言公出揖衆議臣曰魯頌姜嫄閟宮春秋考仲子之宮皆別廟漢唐來皆然至宋始有竝

稱者其禮已謬然皆諸帝繼室作配天子非後世子孫嗣承帝位尊崇所生者惟宋李宸妃歿仁宗傷痛始追尊稱祭非禮不足爲法衆議臣皆是公言定議上上喜曰大義深恩竝行不悖改稱孝肅太皇太后祀之奉慈殿奉慈殿者在奉先殿西上初建奉祀母孝穆太后令稍展其制中室奉孝肅左奉孝穆嘉靖初右奉孝安邵太后公忠信宏厚廉靖方嚴好古力學文翰淳美以禮部尚書掌詹事府卒贈太子太保謚文定王文恪公稱公文不事追琢而體裁具存外若簡淡而意味雋永明興文士獨推西楊有典則公無愧焉



鄭端簡曰、太祖曰、吾取士、欲得經明行修、博古通今、文質得中、名實相稱者、此十君子、可以當之、行誼足以師人、文章足以華國、問學足以明道、才諳足以濟務、隱約足以激時、所謂先進於禮樂者、非歟、嗟乎、吾不得而見之矣、十人、李時勉、陳敬宗、魏驥、吳訥、葉盛、楊守陳、張悅、謝鐸、章懋、并公也。

太子少保邵文莊公

事

茂陵 康陵

泰陵

公名寶、字國賢、無錫人、成化二十年進士、初知許州、弘治七年、入戶部爲員外郎、郎中、陞按察副使、提學江西、累官臬藩長、正德四年、陞副都御史、總漕、巡撫江北、公有遺

譽在江淮不事赫赫漕大小將校皆嚴憚未幾事忤逆瑾  
瑾又惡平江伯平江伯者漕帥也事連公瑾益怒禍且不  
測長沙力解得致仕瑾誅起巡撫貴州陞戶部侍郎公故  
熟知部程法見財用竭耗心憂之七年請養母歸十四  
年陞南京禮部尚書辭嘉靖初再辭詔特與終養母服  
闋請致仕不允卒贈太子少保謚文莊公質性淳懿問學  
該洽孝親收族獎誨後進應務之才細巨皆適所著學史  
簡端錄二書巡撫吳廷舉上于朝

太子少保傅文毅公

事

茂陵  
康陵

泰陵

公名珪字邦瑞清苑人成化二十三年進士庶吉士授編

修弘治十三年陞左中允正德四年逆瑾惡翰林不附已矯旨大明會典文訛舛奪預修者官公降修撰瑾敗復中允五年以學士陞吏部右侍郎明年轉左尋陞禮部尚書常是時康陵好佛自稱大慶法王外廷雖聞之而無徵俄內批禮部番僧請腴田千畝爲大慶法王下院乃書大慶法王與聖旨等公佯不知執奏就爲大慶法王者敢並至尊書囊天子壞祖宗法大不敬詔勿問田亦竟止寵伶臧賢請改牙牌公曰優敢亂祖宗法邪臧又欲改教坊司印公曰優敢亂祖宗法邪皆格不行時流賊亂中原太監陸閏總軍容征久不捷諸內臣又立監鎗名

益山後曹內臣統軍下廷議衆莫敢先發公奮曰兵老民  
疲賊日熾以冒功者冗僨事者漏罰失將士心今賊在郊  
圻肺腑間民囂然思亂禍在宗社旦夕吾輩死不贖責  
諸公尚首鼠耶疏上竟遣監鎗諸內臣俄有旨令公致仕  
杜門謝客及卒遺命無請葬祭嘉靖元年理守正文臣贈  
太子少保謚文毅公朴端簡諒自檢甚嚴孝友之行孚於  
鄉曲

尚書陳公

事

茂陵

泰陵

康陵

公名壽字本仁新淦人戌籍遼東成化八年進士弘治元  
年以都給事中陞大理寺丞御史爭寺丞劾公吏部尚書

三原王公言壽廉正稱執法吏改南光祿少卿陞卿南鴻臚十三年陞僉都御史巡撫延綏十六年陞南京副都御史正德元年南京科道劾逆瑾被逮公抗疏救諸言官瑾怒奪職八年薦起巡撫陝西未幾遷南京兵部侍郎九上疏乞休陞南京刑部尚書致仕初壽在科萬貴妃寵族人橫甚中官梁芳又結妖僧繼曉公疏論繫詔獄得釋在榆林會火篩入寇出奇兵却之加俸一等旣歸田杜門謝客陝西鎮守內臣廖鏜暴虐吏民楊文襄公言公忠鯁輕去就宜起公撫陝公至陝鏜畏歛戢比公去陝人號哭擁公不得行公卒久之都督楊宏陝人也上疏言壽仁廉恤下

知兵能遏虜請卹其後公歷官四十年大半在數地食祿  
任事不久而廉名最著老無所歸諸子旅寓飄泊公歿不  
能葬久之親舊相周僅歸其喪公爲言官時直論時政得  
失不彈劾人曰吾父戒我勿作刑官在人若言官在人尤  
甚吾不敢妄言文襄公曰宋王素爲諫官言人材難得無  
事之時當爲朝廷愛惜程明道爲御史告君曰使臣拾遺  
補過則可若搜索臣下短長以沽直名臣不能也本仁得  
之矣

尚書謝文肅公

事

茂陵

泰陵

康陵

公名鐸字鳴治浙太平人天順八年進士成化元年授翰

林編修校勘通鑑綱目因上封事言講學圖治十一年遷  
侍講未幾請告弘治元年薦起修實錄三年陞南國子祭  
酒上修明教化六事明年致仕又累薦十二年家拜禮部  
侍郎掌國子祭酒事力辭不允公先後在國學律已率人  
嚴立規約兩監中故有羨金公盡藉於官均贍僚屬構書  
樓東西庑諸經史刻北監廟街湫隘益市地闢其斜側又  
市廬舍三十餘區居博士助教諸學官諸生貧者贍給或  
者賻襁皆出羨金不妄費一錢請從祀楊時十六年預修  
通鑑纂要是歲請致仕特賜告正德三年瑾勒致仕五年  
卒年七十六贈尚書謚文肅鄉人方正學殞身滅族沉鬱

百年公不避忌諱收綴遺文行于世所著有桃溪集續西山讀書記伊洛淵源續錄元史本末宰輔沿革國朝名臣事略尊鄉錄赤城新志忠諫錄祭禮儀注公嘗曰我太祖有度越歷代者五事攘克夷狄收復諸夏也肇基南服統一天下也威加勝國鋒刃不交也躬自創業臨御最久也申明祖訓家法最嚴也

都御史熊莊簡公

事 茂陵 秦陵

公名繡字汝明道州人成化二年進士爲御史坐事謫清溪知縣累官都御史巡撫延綏操勵潔廉餼廩有羨不入私室套虜三年不大入塞憂去起拜兵部侍郎陞兩廣右



都御史逾年召入南臺正德三年中官李榮忽傳旨熊繡  
致仕公屏居山中斷絕書問生事蕭條俯仰益困公卒長  
子已夭繼子又夭巡撫秦金爲請于朝贈南刑部尚書明  
年太僕少卿何孟春上疏曰竊見故都御史熊繡事母能  
孝事兄能友居貴能貧居常能儉敷歷中外四十餘年守  
法徇公推賢嫉惡不邀時譽不徇近功言無爽於屬垣行  
弗虧於顧影往年都御史戴珊張敷華卒其門生屬吏子  
孫咸請易名主事張鳳翔孔琦卒鄉人請卹其家聖朝  
表勸清賢不吝恩澤繡才節操履無讓珊等賜謚卹孤惟  
宸衷軫允幸甚詔給繡繼子子端米月一石謚莊簡時

有工部侍郎潘禮歸德人清廉恬退未老乞休弘治間年八十一巡撫韓邦問疏言禮歷官居鄉益堅晚節草廬蔬食不求安飽詔給米月三石南工部尚書胡拱辰淳安人著勞蹟晚益清謹弘治間御史上其貧薄特給輿廩正德初遣行人存問年九十二贈太子少傅諡莊懿邦問亦仕至尚書致仕年九十二卒仁和有王琦字文進舉人乙榜授汝州學正陞御史山西僉事提學改四川乞致仕歸清介自持不治生產冬大雪僵臥不能出門戶或唁之曰吾求無愧於心耳雖飢寒無不樂也天順間竟以飢寒卒臨潼李崙字世瞻篤實莊重雖祁寒暑雨手不釋卷成化

六年進士。歷知廬州府。陞河南叅政。清慎絕俗。吏事克修。卒之日。貧不能葬。妻郝不免飢寒。守臣爲奏。上得給米。終其身。沙河朱裳。字公垂。正德九年進士。少勵清節。貧困。裕如也。提學御史顧潛知裳。檄府資裳學。京師裳不受躬。自炊汲爲御史。寒約如故。巡按山西山東。有風采。人稱裳爲長齋御史。爲鞏昌知府。歷浙江副使。福建按察使。浙江布政使。副都御史。治河乞歸。再起治河。卒。清堅自信。士頌其廉。民懷其惠。饒州孫需。字孚吉。成化八年進士。歷官南京吏部尚書。守法畏公議。白首清風。嶢然不滓。雖不能餐。揚功名。有赫赫之譽。顧正德間。大臣多掎克回通。需獨以。

廉約稱。卒。贈太子太保。謚清簡。絳人陶琰。字廷信。成化十七年進士。歷仕至都御史。三理漕事。嘉靖初。爲工部尚書。改南京兵部尚書。叅贊機務。乞致仕。加太子太保。歸。琰宏才偉度。累試繁劇。卹國勤民。動著聲績。中忤權倖。屢進屢退。方毅直亮。喜愠不形。自奉儉節。每飯一蔬。徵行罷歸。蕭然行李。三竹筥相隨者數十年。卒年八十四。贈少保。謚恭介。子滋。正德九年進士。爲武選郎中。論大禮。謫戍。

祭酒魯文恪公

事 泰陵 康陵

公名鐸。字振之。景陵人。弘治十五年進士。屢吉士。入翰林。閉門歛跡。不事交遊。爲編修。益沉潛學問。不專爲文詞。歷

司業祭酒端飭自勵日危坐焚香讀五經四書不肯言人  
短長及時政得失虛心約已清慎不渝屢請告屢起屢歸  
羣情鄉慕益兢持名節嘉靖初交薦不起卒年六十七謚  
文恪

副使邵公

事 泰陵 康陵 永陵

邵清  
不愧  
名

邵清字士廉江寧人甫三歲母疾革置公別室哭不已謂  
家人曰死者吾母也曷俾我一視聞者哀之爲弟子員卽  
以文行爲當路所推許屬頒制諸郡京兆冀公絀欲以  
此瞻公擇維揚運司委之公辭不往弘治壬子領鄉薦明  
年授江西德化學諭正己率人流俗問遺無敢及門者乙

卯秋主山東試去取咸自主事竣就道有謁贊者拒不受  
滿九載留於家督學邵公寶巡撫林公俊累疏薦公吏部  
移文趣行十月詣部試第一太宰馬公文升都御史戴公

學政轉授御史今亦無之矣

珊廉公賢授山西道監察御史委督溝橋抽分公痛革宿  
弊奸無所容近侍蕭敬陳寬託院堂相囑不少貸正德改  
元以公督皂禁諸役原額百名外院長及年深御史用之  
公悉覈以應役戚畹張延齡奏人負券若干緡得旨追  
給公曰御史執法之官豈爲人索私負者邪謝馬崔公都  
御史張公咸以爲囑公不從隨進二疏一崇大信以全國  
體一停織造以清鹽法所論劾皆中貴人下戶部議行七

月按鹽長蘆兼理河道公覈餘鹽革買補恤竈下禁應捕  
勢豪鹽商廩廩重足立貪吏多棄印綬去自天津抵濟寧  
一路夫力公壹意節節約省千餘金逮諸姦豪倚戚宦爲  
窟者論如律權倖及中人多不利于是馬永成家僮及諸  
賈人合謀妄奏逆瑾因遣官校逮公榜於午門下家人泣  
公慰之曰我非自敗名節以辱先人至此况得失在我何  
哭爲抵家杜門屏居灌蔬課子而已瑾怒未釋據公所陳  
停布疋疏罰米一百石及保舉都御史雍泰罰米二百石  
瑾伏誅都御史李公克嗣巡按王公完交薦嘉靖癸未有  
雲南僉憲之命公至任適巡撫王啟惡臨安推官江魚賕

千戶龔勝愬魚欲坐以貪淫黜之公知其誣擬以公罪還  
職王大不悅後巡歷新建諸寨繕兵旅修城垣來商賈疏  
溝洫爲久遠計滇南多珍奇所入廩祿柴薪而已比齋賀  
詣京行李圖書之外無一長物事竣回滇分巡洱海會叅  
議趙淵往勘武定上官約救甚嚴下至胥吏輿臺一無所  
染夷人悅服後以觀察當調聞報卽南家居逾時見山桂  
公重其名檄取赴京公以疾辭已丑冢宰西樵方公檄如  
限赴選補廣西分巡桂林後改左江兵備忠州龍州上官  
罪惡日甚公不動一兵而坐擒之疆圉晏然撫巡以公清  
苦之節明敏之才方倚重之而公業倦游矣上書兩乞休

方桂公內孫意人才如此



乃得請歸無室廬依外氏以居日中或未舉火意豁如也  
督學御史林有孚往訪之笑語移時貧無茗具可設林歎  
息而去宗伯霍公韜以沒官田餽公力却之丙午秋年八  
十而歿陳公鳳贊曰嗟嗟介士邦之司直可賤可貴簞簞  
必飾萬里來歸葆茲固窮蕭然素業逸矣高風

中允景公

事 康陵 永陵

景公暘字伯暉少產揚之真州尋徙居金陵爲人器量弘  
雅凝然負公輔之望數歲時隨父官廣州劉大夏見其文  
異之曰此國器也正德戊辰舉進士第二人授翰林院編  
修時逆瑾亂政挾勢凌轢朝士見者靡不重足屏氣其不

爲阿者、賜及何塘崔銑呂枬也。在館職、以不獲裨補時政、  
居恒深念、作自罰一篇。其詞曰：凡受職於天子、若臺閣、  
省署、藩臬郡邑、以及百執事、咸有常職、晨興而夜畢、終日  
業業以從事也。尚慮其有遺若謬焉者、不若是曰不職、而  
有罰。罰且弗測、又不容以緩也。而蒞是職者、必自責、自將  
於勤慎、所以補過也。雖至蹇劣、亦不敢不然。女雖職、天  
子近侍、在古六太之列、然史局不責以史事、經帷不責以  
進講、旣不得成啓沃開導之益、與磨研編削之功、而退復  
不束修自勵、而恬享大官之賜、美服而安坐、於心能自寧  
乎。古稱竊位、蓋近是也已。夫語弗慎、爲誇爲毀譽、爲誕爲

凡近爲諂爲易爲飮爲譖行已弗慎爲矜爲貪墨爲放縱  
爲邪淫爲率易爲苟且爲側媚爲薄居家弗慎爲兄弟妻  
媵女凌童僕輿阜里閉昏姻女欺而又弗勤於誦覽書史  
精研義理以博所見聞則人將鄙之而於自居亦甚卑矣  
古人云一事不知儒者所耻能無忤乎凡此皆女之職也  
女欲自立於兩間而不負 天子顯用之意能弗勤乎莊  
子曰適百里者宿舂糧適千里者三月聚糧言不可不豫  
也況女又將有臨事之責也女能弗豫已乎百司執事皆  
有警罰女縱不及於是如百司執事寧不愧于人非鬼責  
乎且又安能終保其不女及也其刻意自勵如此久之爲

講官當進講必越宿齋沐覲有所感悟九年遷國子司業以資當進侍讀梁儲曰成均爲多士範非君不可賜口朝廷官人敢自擇邪於是六館諸生人人以爲得師二年請養而南改左中允管南京國子司業事時南方士競便利賜於請託壹切謝不行士習稍正與諸生講解寒暑不輟典籍餽廩私益以斛後知之歸其益曰吾雖貧何相賊也辛巳以母憂去位甲申服除北上行至真州病卒易簀之地卽其懸弧處也人咸異之賜爲人篤於孝義母目盲萬方療之不愈旦夕禱於神一日雙瞳炯然舊疾如失人稱其孝感云姊早寡奉與母居爲嫁娶其子女使得所友人

張貢見暘女欲與婚未聘也貢尋卒暘哭曰曩業心許之  
忍負吾亡友乎卒召其子妻之居官清約過甚不異布衣  
時每升監乘一牝羸蹢蹢行旁觀者率不能堪暘自若工  
行書尤善小篆與國初周伯琦埒至今人藏之以爲榮爲  
文以意勝耻事鈎棘詩蕭散有致嘗曰詞貴其達若以摹  
擬爲工按古人之跡尺尺寸寸務求肖似何以達吾意哉  
識者韙其言所著有前谿集若干卷行於世論曰貢生  
爲傳不得職至哭泣以死古人之不苟於其官如此史秩  
近世視爲冷局類以翫愒自放而暘爲詞以自勉責何其  
厚也乃若處高爵膺仕略不以國安危爲念而唯身家是

營聞賜之言可以愧死矣

尚書嚴恭肅公

事

永陵

昭陵

定陵

嚴恭肅公清字直甫號賓所其先五代祖名子敬者自浙之嘉興徙居滇父鏌生四子公最少而咄咄奇悟鄉先達光祿施昱擇壻得公以女適之嘉靖癸卯舉於鄉明年成進士除富順尹富順故劇邑或以調公此未泮之劒而輕斬蛟斷犀耶公謹謝曰小子何敢抑余劒也乃方在治中惟工之所鑄而擇利可乎至則能聲大騰以救荒課爲天下最丁母憂再除邯鄲其治如故操尋入爲工部屯田司主事歷員外郎郎中督修外城及九陵皆斤斤謹出納

侵牟吏膠手所省費以巨萬已工成當叙陞公辭不受受  
加俸丁父憂復除兵部車駕坐竹出知保定府居保定三  
年課復最歷陞易州兵備副使陝西叅政四川按察使卽  
其地轉右布政使所至自撫按特舉及兩京臺諫會舉不  
下數十疏隆慶戊辰擢都察院右僉都御史巡撫貴州尋  
改四川公故川吏知其民所疾苦乃具籍川課之當輸京  
者議割二十萬金就近改給陝西軍餉罷郡縣卒之團操  
成都擾民者貢番入邊則爲定限額數額外不得浮一人  
他約束一切以惠利爲本而痛持豪家悍吏以法以是士  
大夫譽誹常參牟而內江趙文肅公獨深知之會有以流

盜註公當落職趙公力爭得予告候調候調五年起督  
鴈門關不果改貴州入爲南大理寺卿尋改北歷刑部吏  
部右侍郎陞刑部尚書上之知公自其在刑部能執法  
不骫權勢始旣柄用典銓則日夜討故事論官材承掾以  
下皆親爲標署楊遵彥之默識黃次公之至精不能絕也  
上薨華以太平屬公且未艾而公病歸矣歸之日遣使  
慰勞仍賜馳傳以萬曆庚寅卒於家公性檢厲勤於事其  
操行嚴於趨舍辭受尤廩廩所居官身自與僮僕食羶衣  
敝蕭然也橐中裝雖圖書琴鶴不敢取諸人蜀王慕公  
使使致扇鉅微餉不受初拜尚書貧不能具服色束素屣



帶以朝其輩或指戲之公釋褐時玳瑁七品帶故在耶  
公笑曰不然夫犀帶不裝金安知非玉吾顧恐難爲上耳  
公薰然長者色溫氣和人無賢不肖貴賤皆禮接之其亭  
法處議本人情計久遠無崖岸峻物之行誰咋抵掌之談  
以故明主眷遇尤渥而海內至今稱大人之能安國家  
鎮雅俗者必首公云

侍郎程公

事 永陵

程公文德字舜殷嘉靖己丑進士方上臨軒策士覽公  
對嘉之賜御批擢第一甲第二人官翰林編修已坐同  
官楊實卿封事下詔獄謫信宜典史前後翰林三年餘

所獻郊祀議、庶吉士疏、盧雪頌、靈鷲詩各一。親奉  
行再進內訓講章及四詩。上嘗開無逸殿宴近臣、公得  
與。上無逸講章、乙未量移安福知縣、丙申召爲南京兵  
部車駕主事、轉員外郎、迎養歲餘、丁外艱、辛丑起復、補兵  
部車駕、轉郎中、屢上禦虜疏、甲辰擢廣東按察副使、提督  
學校、未上擢南京國子監祭酒、庚戌擢禮部右侍郎、以外  
警奉旨提調監督宣武門、并相陸妃墳、壬子轉吏部左  
侍郎、癸丑會試知貢舉、畢事兼翰林院學士、掌詹事府事、  
教庶吉士例。賜帝社稷胙、二乙卯將擢南京吏部尚書、  
忤旨、改南京工部左侍郎、辭謝有言、疏職罷歸、公爲人

博厚坦夷、不設町畦、聞甘泉湛冢宰若水明道術、走其門、  
未有得其後、激於人言、卓立檢飭、斷斷必爲君子、不忍以  
世俗終其身、幡然變故態、視舊所爲如兩人、嘗祭長陵、  
中道偶談孝宗皇帝事、爲涕下、悲不自勝、見實卿封事、  
調停削名甚衆、批拷掠無一語、在廣中舉何王金許之學、  
誨諸生、遷信宜學、建麗澤書院、至安福行鄉約、處里役、摧  
強節用、下士愛民、建復古書院、兵曹嘗言車戰法、多見采  
行、臨南雍、以體諸身者爲言、用情尚質、而謹服習、吏部嘗  
考察京朝官、留意賢否、嘿有助益、詹事故事、養尊望而遠  
外嫌、公間兩直隸河南山東大饑、朝議開納而澤不速下、

爲計粟麥忝菽可助食者稱其數請早入以期有濟上  
從之南京家宰之擬公苦親喪未舉也顧以得罪旣歸囊  
貲餘金

卷二十終